

## I DUE CACCIATORI

( si incontrano sulla scena, scene di saluto )

**NINO** - ( è vistosamente infasciato e medicato ) Pippu, c'ha fattu tuttu stu tempu?

**PIPPO** - C'ha fattu? Ca si tu cunti non ci criri, haia statu all'Africa.

**NINO** - All'Africa e a fari chi?

**PIPPO** - Ma pi risparmiari un pocu di picciuli...

**NINO** - Perciò ... pi risparmiari i picciuli ti ni vai all'Africa? E picchi non ti facevi na passata a villa, chidda è gratis, non risparmiavi chiu assai?

**PIPPO** - Chi centra? Iu mi ni ii all'Africa ppi risparmiari i sordi d'e scarpi.

**NINO** - 'Nca picchi? Forsi picchi dda si camina a peri scausi e accussi non si spardunu i scarpi, averu?

**PIPPO** - Ma u viri ca non ha caputu nenti? Mi ni ii all'Africa ppi risparmiari i sordi d'e scarpi, picchi cca custavunu troppu assai.

**NINO** - Bellu scinziatu! Pozzu capiri ca dda i scarpi costunu chiù picca, ma i sordi d'o viaggiu non foru chiò assai?

**PIPPO** - Ma u sai ca ccu tia non si po' parrari? Piggli sempri avanti! Fatti spiegari tutti cosi e poi u capisci.

**NINO** - Avanti, cunta!

**PIPPO** - Una, dui, tri quattu...

**NINO** - Ma chi fai?

**PIPPO** - Cuntu! non m'u dicisti tu?

**NINO** - No, dicu cunta, nel sensu di: cuntimi ssa storia...

**PIPPO** - ( *perplesso* ) C'era na vota un re, ca aveva na figghia ianca comu a nivi, e cc'u mussu russia comu u sangu, e si chiamava Biancanevi... ma daveru a vo' cuntata tutta?

**NINO** - Bonu, va'... dicu cuntimi ssa storia d'e scarpi...

**PIPPO** - Ah, veru... i scarpi, allora, ascuta: Mi trovava a Via ..... ppi ccattarimi un paru di scarpi, giustu? Talu 'nta na vetrina e chi viru?

**NINO** - Boh?

**PIPPO** - Chi viru?

**NINO** - Ma chi sacciu, non è ca era dda ccu ttia, chi è ca viristi?

**PIPPO** - No' sai? E allora t'u dicu iu: un bellu paru di scarpi di coccodrillu!

**NINO** - Tanti auguri e allora?

**PIPPO** - E allora? E allora erunu u paru di scarpi chiù belli ca haia vistu, belli, belli daveru!

**NINO** - E allora trasisti e t'i ccattasti.

**PIPPO** - Si ora! trasii e ci addumannai u prezzu, picchi fora non c'era scrittu

**NINO** - E chi ti dissuru?

**PIPPO** - U prezzu.

**NINO** - U capii, dicu: quantu ti dissuru ca custavunu?

**PIPPO** - Picchi ti vo' ccattari macari tu?

**NINO** - Ma chi centra? Si mi sta parrannu di prezzu, dimmi quantu ti custaru, no?

**PIPPO** - Non mi custaru nenti.

**NINO** - T'i rrialaru?

**PIPPO** - Si ora, non mi custaru nenti picchi non m'i cattai.

**NINO** - E picchi?

**PIPPO** - Picchi custavunu troppu assai. Pensa ca ppi 'nparu di scappi di coccodrillu vulevunu du miliuni!

**NINO** - E chi su' pazzi?

**PIPPO** - A stissa cosa pinsai iu: chi su' pazzi? E ci addumannai, macari: Chi siti pazzi?

**NINO** - E iddi chi ti dissuru? Dimmillu

**PIPPO** - No!

**NINO** - Non m'u vo' diri?

**PIPPO** - No dicu mi dissuru: non semu pazzi. U fattu è ca i scappi di coccodrillu sunu merci rara e costunu accussi assai.

**NINO** - Vih chi cosi, u sai ca no' sapeva

**PIPPO** - U sacciu ca no' sapevi, mancu iu u sapeva, e chi ti pari ca si u sapeva ci'u ddumannava?

**NINO** - E allora?

**PIPPO** - E allora dissi: du miliuna costunu i scappi, un miliuni costa u bigliettu ppi l'Africa... dui e dui fanu tri...

**NINO** - No, dui e dui fanu quattu...

**PIPPO** - Si, ma iu n'arrisparmiava unu ... 'nsumma dissi: mi ni vaiu all'Africa cu un miliuni, i scappi di coccodrillu mi pigghiu iu stissu, un viaggiu mi fazzu, i scappi ci l'hau e sparti arrisparmiu un miliuni. pinsai giustu?

**NINO** - Giustissimu.

**PIPPO** - Allora arrivu dda, e subito mi circai u postu unni erunu i coccodrilli, appena visti a na' para di fricani ci dissi: ho venuto per le scarpe di coccodrillo

**NINO** - ...sono venuto...

**PIPPO** - ...ho venuto per le scarpe di coccodrillo

**NINO** - ... sono venuto...

**PIPPO** - Senti Ninu, non m'arrisurta ca c'eri macari tu...

**NINO** - Dico si dici: sono venuto, no:ho venuto...

**PIPPO** - Vabbè o sono venuto o ho venuto sempri u stissu i fricani mi caperu m'u dissuru: goggodrilli stare a fiume. E iu partii subito p'u ciumi.

**NINO** - E arrivatu dda?

**PIPPO** - Arrivatu dda, subito mi misi in agguatu: u cuteddu ammenzu i denti, mi calai a moddu all'acqua e aspittai u coccodrillu, dopu ocche menz'ura viru

na cosa 'nta l'acqua ca galleggiava, ca pareva un truncu d'arvulu, iu subbitu m'appustai davanti e dissi comu arriva u cchiappu...

**NINO** - E comu u cchiappasti?

**PIPPO** - ...'nto mussu era veru un truncu d'arvulu... Passata ocche autra menz'ura arrivau u coccodrillu: e ddocu non ti dicu. ti l'ha vistu i film di Tarzan?

**NINO** - Sì, quannu discurri cca scimmia?

**PIPPO** - No, chi centra quannu ammazza i coccodrilli...

**NINO** - Sì si l'ha vistu: quannu si ci metti a cavaddu, poi i cchiappa do coddu, si ci metti di sutta e ci'azzicca u cuteddu...

**PIPPO** - Perfettu: a stissa cosa fici iu, film di Tarzan mi n'ha vistu tanti ca para ca hava fattu sempri stu misterii... 'nsumma ammazzu stu coccodrilu, u portu a riva u votu a panza all'aria: ... nenti

**NINO** - Comu nenti?

**PIPPO** - Ca nenti! Allora mi mettu di novu a moddu, n'arriva n'autru, u mmazzu, u portu a riva u votu a panza all'aria: ... nenti

**NINO** - Nenti?

**PIPPO** - Nenti! Allora mi mettu di novu a moddu, n'arriva n'autru, u mmazzu, u portu a riva u votu a panza all'aria: ... nenti

**NINO** - Nenti?

**PIPPO** - Nenti! Allora mi mettu di novu a moddu, n'arriva n'autru, u mmazzu, u portu a riva u votu a panza all'aria: ... nenti... 'nsumma dopu na iurnata n'hava ammazzatu almenu na trentina...

**NINO** - Mizzica... na stragi, e i scappi?

**PIPPO** - I scappi? e chissa fu a tragedia: oddiu ca di trenta coccodrilli ni potti 'ncagghiari unu ca purtava i scappi!

**NINO** - Ma tu macari! Chi ci vulevi truvare i scappi di coccodrilu misi e peri?

**PIPPO** - E picchè chi l'havunu a purtari 'nt'aricchi?

**NINO** - Veru spertu si perciò un paru di scarpi di coccodrillu ca costunu du miliuni pensi ca u coccodrillu è accussi besti aca si metti quannu è a moddu l'acqua, accussi ci 'nfracitisciu tutti?...

**PIPPO** - A diriti a virità non c'iarriflittii, ma comunqui ora semu cca e scappi di coccodrillu non ni potti aviri. Ma dimmi na cosa chiuttostu, tu ca si tuttu 'nfasciatu, chi è ca ti succidiu?

**NINO** - Chi mi succidiu? Ca macari iu a fattu u caciaturi di sti tempi...

**PIPPO** - E comu fu ca t'arridduccisti daccussi?

**NINO** - Ca chi t'haia diri... Era o bar e discurreumu di sordi e non sordi di misteri e non misteri, quannu arriva unu e fa: iu u veru misteri ppi fari sordi u ttrovai. E tutti ddocu: e chi fai, e chi è...

**PIPPO** - E chi è?

**NINO** - Il cacciatore di orsi!

**PIPPO** - Mizzica un misteri pirculusu però...

**NINO** - Chiddu ca ci dissimu tutti, iddu invece ni spiegau: no non è ne difficili ne pirculusu

**PIPPO** - E comu po' essiri?

**NINO** - Iddu fa: pi cacciari l'orsu non ci voli autru ca un vastuni: si va davanti a 'caverna unni dormi l'orsu, si ci tira na petra iddu nesci 'nfuriatu ca testa vascia, tu ci carichi un corpu di vastuni 'ntesta, ci levi a peddi e t'a vo' vinni...

**PIPPO** - Tuttu cca?

**NINO** - Tuttu ccà! Allora iu dissi: prima ca ci provu vogghiu viriri comu si fa, e ci dissi: ci pozzu veniri ccu lei a viriri comu si fa?

**PIPPO** - E iddu?

**NINO** - E iddu, gentilissimu, vinissi ccu mia e ci'u fazzu viriri.

**PIPPO** - E tu ci isti?

**NINO** - Certu ca ci ii, etuttu funziunava precisu comu dissi iddu: si misi davanti a caverna, ci tirau na petram, l'orsu nisciu, iddu ci cafuddau un corpu 'ntesta, ci livau a peddi e s'a ivu a vinniri, tempu un quartu d'ura aveva u pattafogghiu chinu.

**PIPPO** - Ma si è accussi favcili com'è ca ti cumminsati daccussi?

**NINO** - Aspetta... iu, subbitu m'attrezzai di vastuni, di petra e mi ni ii 'ncampagna, sparti pinsai: si trovu un orsu chiu rosso varagnu chiossai, no?

**PIPPO** - Giustu!

**NINO** - Allora mi circai na caverna bella rossa, picchi pinsai: chiù grossa è a caverna, chiù grossu è l'orsu, giustu?

**PIPPO** - Giustu.

**NINO** - Mi piazzu davanti, u vastuni prontu, tiru a petra... e chi nisciu?

**PIPPO** - E chi nisciu?

**NINO** - .... u trenu...era a galleria d'u trenu....

**F I N E**